

Iepa, irakurle! Hauxe duzu zure txokoa, inguruko deialdien berri emateko edo zeure iritzia eta kezak plazaratzeko. Deitu 943 300 222 telefonora edo bidali mezua 943 300 255 faxera edo **barkatu_ama@egunkaria.com** posta elektronikora. **Animatu!**

internet en irristatzen

irristatzen@egunkaria.com
→ jabi zabala

Spam amesgaiztoa!

Gero eta lagun gehiago kaltetzen duen fenomeno da *spama* edo eskatu gabeko publizitate mezu elektronikoena. Jendeari pazientzia, eta denbora galaraziz, eta konexioen banda zabalerari iritsiz, azken batean, dirua gastarazten die haren biktimei.

Internauta hasiberria sarean sartu, eta berehala hasten da bere posta helbidea edonori ematen. Lagunei idatzeko ez ezik, bidaia agentzia bateko albisteak jasotzeko edo rock talde baten gaineko berriak jasotzeko. Baina koitaduak gu! Promiskuitate horren ondorioz, hasieran kalkulatu ez genuen mezu zaparrada jasotzen hasiko gara laster; konektatuta ematen dugun denboran, irakurri, klasifikatu eta ezabatze gai garena baino gehiago.

Baina hori hasiera baizik ez da; izan ere, larriena geroxeago helduko zaigu: eskatu gabeko zabor-publizitate mezuak. Ez da guk eskatu dugun informazioa; eta, gainera, bidaltzailea ezezaguna zaigu. Mezuotan denetarik eskainiko digute: viagra

online, telebista deskodetzaileak, Errusiako web diseinugileak, toner edo inprimagailu merkeak, unibertsitate diploma faltsuak... Eta sexua, sexua eta sexu gehiago, sarearen negozioirik handiena.

Lehenengo mezuak gure postontzira heldu orduko, ziur egon gaitezke gehiago izango direla bidean; eta, dagoeneko, gure helbide pertsonal hori *spamaren* gupil zoroan betiko jausi dela. Zabor mezuak edo *junk e-mail* izenaz ezagutzen den fenomenoak buruko min eta kexu gehienek iturria da internautentzat. Haren kontra sortu den CAUCE elkartearen esanetan, telefono bidezko marketin kanpainekin aldera daiteke, norberak hartu behar baitu mezua jaso eta errefusatzeko lana. Etxeko postontzian agertzen diren paperezko publizitate mezuen antzeko fenomenoak da, baina doan ateratzen zaio bidaltzaileari, horregatik du hain arrakasta handia.

Batzuetan, erantzuteko lana hartu eta «mesedez ez bidali mezu gehiago», «remove me» edo halako zerbait idatziko dugu. Txarto. Adituen arabera, erantzun horiek helbide horretara doazen mezuak norbaitek irakurtzen dituela ziurtatzeko bakarrik balioko die spamerre; eta ez dute, hortaz, zerrendatik ezabatuko.

Posta helbideak saldu eta erosten dira. Horregatik jasoko ditugu gero eta mezu gehiago. Mezu horietako batzuetan, milioika helbide dituen CD bat eskainiko digute; hori erosiz gero, nahi dugun mezua lagun askorengana helarazteko. Litekeena da gure helbidea ere bertan egotea.

Horren aurrean gomendatzen da gure helbide pertsonala ahalik eta gutxiena zabaltzea. Baina neurriak jarrita ere, batzuetan inori eman ez diogun helbide hori spamarren sareetan jausten da.



Spamer lotsagabeen ausardiaren azken adibideak jarduera honen kontrako araudiak agertzearekin batera etorri dira. Orain, zabor mezuetan "this is not spam" gisako mezuak datoz, eta ustez zerrendetatik kentzeko balio duten *remove* aukerak ez dabilta. Larriena gertatu da, ustez, *spam*-aren kontrako *Trac* izeneko webgune batean helbidea eman dutenek zabor mezuak jasotzen hasi direnean. Webmasterraren errakuntza bati egotzi diote horren ardura baina... Ez dago inorekin fidatzerik.

Helbideak:

CAUCE ■ www.cauce.org
TRAC ■ www.banthespam.com

DANTZA MAITATZEKO GARAIA MIARRITZEN



Iraila dantza maitatzeko garaia izan ohi da Miarritzen. Urtero urtero Maitaldia izeneko jaialdia antolatzen dute bertan, eta haren baitan mundu osoko dantza ikuskizunekin gozatzeko aukera izaten da.

Iragan larunbatetik geroztik hainbat ikusgarri taularatu dira, eta hilaren 21a bitartean are eta ikuskizun gehiago erakutsiko dituzte. Aurten goi-ekitaldian, gainera, Errusiako Baletari omenaldia egingo ari zaizkie. Ordea, Euskal Herrian sortutako bi ikuskizun ere aurkeztuko dituzten egunotan: *Pas de Basque* eta *Eden*.

Dantza ikusteaz gain, dantza egiteko aukera ere eskaintzen du Maitaldia. Hala, Euskal Herriko zein beste herrialdeetako dantzekin ikastaroak antolatu dituzte. Egun bakarreko ikastaroak dira gehienak.

EGITARAUA

JUEVES 12

- 12:00etan: So sur saut konpainia, lorategi publikoan.
- 21:00etan: Balletto di Puglia, Casinoan.

OSTIRALA 13

- 12:00etan: Elirale konpainia, lorategi publikoan.
- 21:00etan: Preljocaj balleta, Gare du Midin.

LARUNBATA 14

- 12:00etan: Robinson konpainia, lorategi publikoan.

IGANDEA 15

- 16:00etan: Grimaldi konpainia, lorategi publikoan.
- 17:00etan: Juan Antonio Urbeltzen eta Argia taldearekin *Pas de basque* ikuskizun berria, Gare du Midin.

ASTELEHENA 16

- 12:00etan: Parenthèse balleta, lorategi publikoan.
- 21:00etan: Parenthèse balleta, Casinoan.

ASTEARTEA 17

- 21:00etan: Bordeleko balleta, Gare du Midin.

IKASTAROAK

- Larunbata 14: Youri Van Den Bosch-ekin dantza garaikidea, Gare du Midin.
- Igandea 15: Berpizkundeko eta Zuberoako branleak, Claude Iruretagoyena eta Christine Grimaldiarekin Ballet Biarritzen estudioan (Hutsetik hasten direnentzat).
- Astelehena 16tik ostirala 20era: Fandangoa Maryse Curveur-ekin, Ballet Biarritzen estudioan.
- Astelehena 16etik ostirala 21 arte: Nafarroako jauziak Patxi Perezekin, Ballet Biarritzen estudioan.

In-komunikazioa



Irailaren 27tik aurrera kalean

argitalpena



'Gaztetxulo' berriro ere gurean.

Ikasturte berriaren hitzorduari fin erantzun dio *Gaztetxulo*, eta ale berria kaleratu du jada.

Irailari dagokion zenbaki honetan Izaro Iraeta telebistako aurkezlea da protagonista nagusia. *Kukkuxeroen uhartea* izenburuarekin elkarriketa luzea egin diote, bere kazetari jardunari buruz eta berak aurkeztzen duen telebista saioari buruz.

Bestalde, euskal boxeoa ere mintzagai dute. Boxeolari gazteak aurkeztu, eta hauek euskal boxeolari buruz dituzten iritzia jaso dituzte. Ohiko atalek ere betiko tartea dute. Musikari dagokionez, esate baterako, azken berrikuntzei kasu egiteaz gain, *Gaztetxulo* berriak Utikan, Wagon Cookin eta Iparkor taldeei jarri die arreta gehien. Literatura, horoskopoa, zientzia, bitxikeriak... hori dira baita ere. Zinemaren atalean, George Clooney ezagunari buruz mintzatzen dira; *Gazteak eta Bakea* sailean *Gazte Abertzaleak* erakundeari egokitu zaio bere iritzia ematea, eta *Hontzaren Ulu* atalean Azpeitiko gau giroa dute aipagai. Bestelakorik ere topatuko duzue adi-adi irakurri gero.